

3

markt sie gleich, das ir herr verschaiden. Sie war ires  
herkommens ain geporne freiin von Reupoltskürchen. Was  
unfal dise zwai eeelut bei ainandern erlitten, erfordert ain  
aigens capitel. \*

5 Sie hat ire tag vil kommers und unmuets gehapt, das  
sich einer billich verwundern sölte, das sie dennost darbei  
so faist und grofs leibs were worden, daher dann graf Carle  
von Zolern mermals gesagt, er glaub, das denen von Zim-  
bern uferlegt, grose weiber zu haben.

10 \* [1428] Was die erlich gräfin für ain gemüet gegen ime  
gehapt, das geben die schreiben, die sie etliche jar darvor  
an ire brüder gethan, wol zu erkennen. Under ander aber  
schreibt sie irem bruder, graf Otten, so domherr zu Strafs-  
15 irem herren here sagen oder schreiben, daz er dann sol-  
lichem kainen glauben geben, dann er hab ir in achzehen  
jaren kain bess wort niehe geben, wifs auch kain mangel,  
den sie an im hab, dergleichen auch kain fürsten oder her-  
ren, den sie für inne haben wöllt; [1429] bitt inne darneben,  
20 da ire baide gebrüeder, graf Berchtoldt oder grave Albrecht,  
zu ime kemen, das er alsdann iren herren inen auch wellte  
versprechen, dann es begegne im vil uflags, daran im doch  
unrecht beschehe; gang damit, wie gemainlichen in andern  
sachen mer, das man mer darzu thue, dann an im selbs  
25 seie. \*

Grave Gotfridt Wernher hat sie in lauter weiser beclai-  
dung und beschuung ein ganz jar clagt. Nit waist man, ob  
sie ainandern das verhaifsen gehapt, dermasen in weisem zu  
clagen, oder ob er sie clagen wellen, wie er graf Ulrichen  
30 von Helfenstain den eltern, auch herr Schweikarten von  
Gundelfingen und andere hat clagt. Solchs hat die mai-  
nung gehapt, daz vor vilen jaren, als er noch am würtem-  
bergischen hof gewesen, der herzog, auch etlich graven,  
herren und vom adel, darunder diser graf Götfridt Wernher  
35 auch ainer gewest, einandern bei handt gegebner trew ver-  
sprochen, welcher des andern todt erleb und das erfare, der  
solle den andern ain viertel jars in weisem clagen. Also  
hab ich auch gemelten graven Gotfridt Wernhern etliche  
user der gesellschaft clagen sehen. Es war nit anders, dann  
40 wie ain orden anzusehen, dann alles weifs, was er antrug.

14 bitt] hs. sich.

I \*